

Tunku ketuai penentang Malayan Union terima pingat



Tunku Abdul Rahman

IPOH, Isnin — Bekas Perdana Menteri, Tunku Abdul Rahman Putra mengetuai lima tokoh veteran anti-Malayan Union yang akan diberi penghormatan khas dan

pingat emas dalam satu majlis di Tapah pada 16 Oktober.

Empat tokoh lain ialah Tun Sardon Jubir, Encik Ghafar Baba, Encik Khir Johari dan Datuk Senu

Abdul Rahman akan diraikan sebagai golongan yang banyak berjasa kepada Umno serta negara.

Menteri Besar Perak, Encik Ramli Ngah Talib dijangka akan merasmikan majlis yang dinamakan "Malam Budi dan Jasa-mu Dikenang" itu bersempena menyambut tahun ke-26 Merdeka dan mengenang kembali jasa tokoh-tokoh Umno yang menentang Malayan Union.

Pengerusi jawatankuasa majlis itu, Encik Ahmad Mustapha Abdullah memberitahu *Berita Harian*, sejarah dan jasa kelima tokoh itu akan dibacakan kepada umum sebelum mereka diberikan pingat.

Sejarah tokoh-tokoh ini dalam Umno sedang dikumpul dan ia akan dirakamkan dalam sebuah buku cenderamata.



Encik Ghaffar



Encik Khir



Datuk Senu



Tun Sardon

Bahan asal dari Arkib Negara Malaysia

Hargai

Lima bekas Menteri Besar Perak turut akan diberi pingat emas dan penghormatan.

Mereka ialah Datuk Shaari Shafie, Datuk Seri Ahmad Sald, Datuk Haji Kamaruddin Mat Isa, Datuk Seri Haji Wan Mohamed Haji Wan Teh dan Allahyarham Tan Sri Ghazali Jawi.

Isteri Allahyarham Tan Sri Ghazali Jawi, Puan Sri Radziah Yaa-kub dijemput mewakili mendiang suaminya yang disifatkan sebagai seorang tokoh pemimpin unggul yang memperjuangkan Umno di Perak.

Selain itu, kira-kira 30 bekas pemimpin Umno cawangan Tapah-Batang Padang akan diberi pingat-pingat dan sijil penghargaan.

Seramai 800 orang, termasuk bekas wakil rakyat di Tapah serta yang masih berkhidmat, turut dijemput untuk menghadiri majlis itu.

Selain ucapan perasmian oleh Menteri Besar, Tunku Abdul Rahman akan dijemput berucap sebagai mewakili keseluruhan ahli-ahli veteran. Timbalan ketua Umno Batang Padang yang juga Ahli Parlimen Batang Padang, Encik Azharul Abidin Haji Abdul Rahim akan berucap sebagai mewakili ahli Umno Tapah yang lama.